



DEO OPTIMO MAX.  
UNI ET TRINO,

VIRGINI DEIPARÆ, ET S. LUCÆ  
Orthodoxorum Medicorum Patrono.

QUÆSTIO MEDICA.

CARDINALITIIS DISPUTATIONIBUS;  
*in eundem discutienda in Scholis Medicorum die Jovis decimæ-octavæ  
Maii M. DCC. XLI.*

M. ACHILLE-FRANCISCO FONTAINE, Chirurgiæ  
Professore, Doctore Medico, Præfide,

*An Melancholicis Peregrinatio?*

I.



UOD in praxi medicâ quæ ad absentem sanitatem revocandam pertinet imprimis observandum est, ut contraria contrariis debellantur, idem in Ygieine quæ circa præsentem conservandam tantummodo versatur, nonnumquam etiam spectandum venit. Neque enim simile potest omnibus adhiberi regimen, nec idem alimentorum genus, nec eadem ætatis temperies, nec æqualis somni mensura, neque par exercitii modus, nec vitanda denique omnibus animi pathemata: ab his communibus viis deflectere aliquando utile est, habitâ scilicet temperamentorum ratione, quorum aliis quæ profunt, aliis nocere possunt. Quod si omnibus hominibus unum & idem temperamentum natura constituisset, una quoque & eadem sanitatis servandæ ratio foret; cum in omnibus & singulis fibræ nec rigidiore, nec laxiores essent, liquores nec vividius propellerentur, nec segnius,

nec ob nimium calorem & motum acriores, nec ob segnitiam & torporem fierent obtusiores; unde pari in temperamentis habito modo, par quoque in conservandis modus haberetur. Sed longè aliter à naturâ institutum est, quæ ut in formâ, sic & in temperamento varia est & diversa. Alii biliosi, alii pituitosi, alii sanguinei, alii melancholici. Suum ergo speciale est cuique regimen, prout hinc temperamentum ab æqualitate recedit, Medicus illinc excedens contrariis oppositis ad debitum modum revocabit. Et ut Imperator aciem, locorum & hostium ratione disponere debet, importunis situ locis, firmissima præsidia, munitis infirmiora collocare: Medicus temperamentorum ratione res non naturales ordinare debet: diætâ debilioribus imperare corroborantem, plenioribus tenuiorem, mollioribus excitantem, vividioribus temperantem, segnibus motum, tristibus hilaritatem, obscuris dissipationem. Sic peregrinationem Melancholicis impertimur, quorum quidquid mentem varietate exhilarare, corpus exercitatione agere possit, tristis indoles efflagitat.

## I I.

**O**BSCURAM Melancholici mentem lividus pallor, tristis aspectus, frontis feveritis, truces oculi ac panè feroces satis apertè declarant. Quod etiam certius ex illius habitu atque affectibus colligitur. Studiis deitius lassidus, nec ulli recreationi indulgens cum quâcumque relaxatione divortium facit sempiternum; scientiis, libris, museo inexpugnabili meditatione hæret: illi remissio intenta, studiosa ambulatio, laboriosa oblectatio, quies sollicita. Improbâ animi contentione laborans, ac quasi *belluo librorum* solitudinem & latebras avidus requirit, hominumque se eripit commercio; quin & iis circumfusus, ab iis sejunctus est & in illorum societate solus, inter colloquentes silens, inter hilares tristis, inter ridentes severus, inter ludentes meditabundus. Cum iis communicare cogitur; adeo morosus est ac difficilis ut sibi vicissim reddat alienos, quibus ipse admodum est alienus. Illius denique nemo unquam compos, nec ipse sæpè sui. Gravata etenim mentem infelicissimæ brevi cogitationes invadunt. Inanes mortis terrores morborumque vexant præstigia, agitudinis suasionem agrum, & in ipsâ sanitate non valentem. Omnia in se animadvertit, omnia scrutatur, non timenda reformidat, levissima perhorrescit; quovis auditio morbo se affectum existimat, quodcumque illi contigerit hujus longâ narratione Medicum defatigat; remedia efflagitat quorum desiderio suum fovet statum, usu sæpè sanitatem labefactaret. Quapropter ad laborantem animi sanitatis curam præcipuè spectare necesse est, & quasi uno obtutu acriter defixum varietate objectâ dissipare. Mens est in corpore quod sol in naturâ. Sole aut hyeme debilitato, aut nubibus intercepto, omnia in rerum naturâ contristantur & emoriuntur, nec nisi redeunte reviviscunt: mente studiis contractâ, aut tristitiæ nube obductâ languescit corpus, torpentque omnes illius functiones, nonnisi dissipatâ restituendæ. Sanitatem igitur animo neglecto tueri velle, idem esset ac inter hyemis squalores ætatis delicias requirere. Emollienda prius illa pertinax animi rigiditas atque etiam diffingenda.

## I I I.

**J**UVAT tunc corporis curæ prospicere. Ut enim restitutâ solis præsentia non statim absque culturâ terræ renascuntur fructus; sic animo restituto, dissipatæque ingravescentibus curis, non statim efflorescit perfecta sanitas, atque ad corpus etiam est attendendum. Apud Medicos autem constat temperamentum melancholicum audire fibrarum rigiditatem quasi spasmodicam, quâ velut immotæ remanentes, nullam in liquida possunt actionem exercere. Præ nimia enim tensione vix adhuc ultra contrahi queunt, difficultas verò relaxari, in quorum motuum

alternis vicibus consistit oscillationis motus, partibus corporis nostri tam necessarius, ut pote qui solus functionum exercitium promovere possit. Nec parum huic opinioni faver Experientia. Melancolici enim animi pathematibus vix afficiuntur, quin statim anxietates & angustias ubique percipiant. Irâ E. g. corripiuntur: gravantur statim & constringuntur præcordia, miram circa cor experientur contracturam, vix ullam vocem edere queunt, anhelant, tremunt cum rigiditate artus, spasmodicè & inæqualiter contractis musculis. Paller facies, capillaribus ita contractis ut strangulentur, sanguini transitum denegent, circulationem intercipiant. Mortis imminet periculum. In tali partium solidarum statu quid de liquidis? Pereunte solidorum actione perit & liquidorum motus; perit illorum subactio, præparatio. Jam non attenuantur, non miscentur, ad secretoria non appellant. Partes aquosiores à crassioribus segregantur, avolant, solæ per secretoria abeunt; cum iis subeundis impares sint crassiores, deficiatque vis illas ad ea propellens. Incrassantur itaque magis ac magis liquida, concresecunt, autâque crassitie jam capillarum fines transare nequeunt. Fiunt obstructions omnis generis, innumeri inducuntur morbi quos futuros prævetere, quàm factis mederi longè facilis est. Porro inter ea quæ possunt huic omnibus malis præire, primas merito sibi vindicat modica exercitatio, quâ scilicet leniter succutiantur organa, attenuantur & miscentur humores, illorum expeditior fit circulus, promoveantur secretiones, aperiantur vasa, juvatur transpiratio, denique præcaveat ille partium torpor sanitati insensibilis. Hæc autem peregrinationem præstare evidens est tristique & mentis & corporis statui pariter succurrere.

## I V.

**ILLIUS** ea est suavitas & dulcedo, ut vix ullus sit qui vel solâ itineris narratione tacitâ quædam non afficiatur voluptate, intimisque moveatur illecebris. Cui non mirè placet illa novi victus inordinata ratio, perpetua diversiorum, & ciborum, & locorum mutatio, objectorumque continua vicissitudo? Præsertim cum ea sit hominis indoles, ut ex varietate & novitate plurimum percipiat jucunditatis. Quem non movet & illustrium civitatum, & ædificiorum superbiorum, & monumentorum antiquorum, quorum fama celebriter in ore hominum versatur, præsens intuitio ac speculatio? Denique an quis est quem non incredibiliter delectet camporum semper nova, semper varia, semper læta facies; aut prætorum viriditas, aut florum varietas, aut segetum aspectus, aut vinearum pampinarumque species, aut aquarum cum murmure decursus, aut pecudum pastus, aut frondentes sylvæ, aviumque in iis garrientium concentus? Quibus omnibus quid potest esse lætius, jucundius, pulchrius? Et si quædam inculta, aut tristia loca passim offeruntur, ut umbræ in tabellis, cæterorum addunt venustati. Quòd si audientibus tam grata est commemoratio, quid res in ipso peregrinante? Omittamus igitur Melancholici ad iter omnia comparantis novam sollicitudinem, domesticam curam, motum, circumcursionem, tumultum, perpetuam avocationem & etiam morositatem majorem; cum nempe cuncta distingit, & huic imperat, & hunc objurgat, & omnibus contradicit. Sequamur proficiscentem. Obscuræ musei uniformitati succedit læta camporum varietas, solitudini comitum societas. Invitat oculos picta virentium camporum facies, à cujus illecebris se non potest defendere, nec omnibus considerandis sufficere: auribus assidue personant comitum colloquia, quorum strepitu primum fatigatus, deinde paululum assuevit, denique à consuetis objectis vacantem necessaria societas occupat, dulcedine movet; cæteris se incipit immiscere, ferocitas commercio emolliitur, asperitas habitu lenitur. Accedunt communia prandia & pocula, diversiorum casus & fortunæ, locorum omnium quæ prætereunt exploratio, quæ invisere & à cæteris cogitur, & ipse curiositate impelli-

4  
tur. Contemplatur hinc sumptuosa ædificia, illic molem antiquitate claram, hic  
solertem architecturam, ornatus eximios, victoriam trophæos, informes ibi reli-  
quias. Cujus hoc monumentum? Quæ hæc statua? quo fato hæc diruta? Cum cate-  
ris colloquitur, ab iis inquiri, de antiquitate certat, temporis edacitatem incre-  
pat, vetustatisque invidiam. Sed Melancholiam nostram obliviscimur; & ipse  
Melancholicus oblitus est. Attentam temperamenti scrutationem, timidam morbo-  
rum aucupationem post reliquit. Tempus cogitandi non est, nec jam ipse idem est.  
Olim ferox nunc humanus; olim solitudinem appetens, nunc societatem; ab ho-  
minum commercio sejunctus, nunc cum iis communicans; uia intentus, nunc  
successione novitatum distractus, tristis denique nunc exhilaratus.

V.

**M**ELANCHOLICIS non minus convenit Peregrinatio, quoad corporis il-  
lorum necessitates. Quid enim utilius iis esse potest quam mutatio aeris in-  
clusi, nec unquam renovati, quem perpetuè dediti desidia & solitudine oclusi du-  
cunt, in aërem apertum & liberum, sole exsiccatum, ventis agitatum & depura-  
tum. Tunc enim levius fit caput, acuantur sensus, gravior ducitur spiritus, per-  
cipitur sensus quidam in toto corpore, quasi partes sese exonerarent & expeditiores  
fierent. Quid diversa exercitationis genera quæ in peregrinatione reperiuntur com-  
memorare opus? Vectionem, æquitationem, deambulationem, cursum, &c? De  
quibus jam toties disputatum est, quorumque à multis expolita fuerunt quæ ad  
Melancholicos pertinent commoda. Si itaque singula hæc seorsim sumpta, tam  
utilia, tam accommodata Melancholicorum temperamento visa fuerunt; quid de  
peregrinatione dicendum, quæ omnium quasi congeries est, aut saltem in quâ sibi  
invicem ita succedunt ut vix reperias momentum quod ab omnibus vacuum sit?  
Nec aliâ de causâ tam sedulo curant Medici ut agrotantes, quibus aquas minera-  
les suadent, ad ipsarum originis loca adeant, illasque ex ipso fonte hauriant. Ipsa-  
rum enim aquarum commodis adjunguntur tunc peregrinationis beneficia. Sic leni  
agitatione & succussione corporis aquarum distributione juvatâ, felicius multo suc-  
cedunt effectus ab ipsis expectati. Nonnulli etiam dubitant an plura aquis quam pe-  
reginationi debeantur. Quidquid sit, saltem affirmari potest peregrinationem,  
tunc utilissimam esse, ut pote quæ locum dat exercitio sine quo nedum prodesset  
aquarum usus, è contra plurimum noceret, cum aliter nonnisi agrè distribuere-  
ntur, stomachoque & visceribus ponderi & incommodo fierent. Habemus igitur in  
peregrinatione quidquid Melancholicis, tum ex parte corporis, tum ex parte men-  
tis utile esse potest, animi tristitiam varietate exhilaratam, curas dissipatas, corpus  
omnis fere generis exercitio agitatum, aquarum usum aliter parum proficuum,  
utile factum & salubre. Concludamus igitur inter omnia quæ Melancholicis ac-  
commodata visa fuerunt, nihil esse utilius, nihil præstantius peregrinatione.

*Ergo Melancholicis Peregrinatio.*

Proponebat PETRUS BERCHER, Parisinus, Baccalaureus  
Medicus, A. R. S. H. 1741, à sextâ ad meridiem,